



KOMUNIKADO

Promé Minister sr. Ivar Asjes a risibí bishita di gobernador di San Andrés sra. Aury Guerrero Bowie

WILLEMSTAD - Djaluna mainta, 16 di mart 2015, Promé Minister sr. Ivar Asjes a risibí bishita di su Ekselensia gobernador di San Andrés sra. Aury Guerrero Bowie. San Andrés ta un isla ku ta forma parti di e archipiélago Colombiano ku ta situá 750 kilometer nort di Colombia. E bishita aki ta e promé bishita ofisial di un delegashon Colombiano despues ku dia 6 di ougùstùs 2014 a firma e akuerdo di koperashon bilateral entre Kòrsou i Colombia.

Den e akuerdo a identifiká algun área di koperashon ku ta: produkto- i/òf servisionan di agrikultura i peska, duana, kultura i edukashon, turismo, infrastruktura, transporte i urbanisashon, salubridat i energia. Durante di e reunion diferente di e áreanan di koperashon aki a keda tratá manera desaroyo sostenibel en general i konekshon áereo entre e paisnan. Alabes e tema di maneho di protekshon ambiental a bini dilanti pa interkambiá eksperenshá riba entre otro e tema di biodiversidad inkluso desalinisashon (saka salu for di awa).

Den e kuadro di biodiversidad Promé Minister a informá di proyekto di museo Smithsonian na Washington ku Kòrsou a koperá kuné, esta Deep Reef Observation Project (DROP), ku a deskubrí mas ku 30 sorto di piská nobo. E sientífikonan di Washington a eksplorá biodiversidad di laman di Kòrsou i esaki ta un proyekto interesante pa San Andrés.

Promé Minister sr. Ivar Asjes a ekspresá di ta sumamente kontentu ku despues di a firma e akuerdo, a tuma akshon pa hasi e koperashon bilateral un éksito.

Riba e potrèt por mira nos Promé Minister sr. Ivar Asjes huntu ku Gobernador di San Andrés sra. Aury Guerrero Bowie i Kònsul di Colombia na Kòrsou sra. Astrid Valladares Martínez.